



Minggu, 04 April 2021

Ogen: Lukas 24:1-12



DIBERU JADI SAKSI KEKEKEN



Kekeken Tuhan Jesus eme salah sada kejadi si mbelin si pernah jadi ibabo doni enda. La lit ise pe ngasup erbahan sie. Pernah lit turi-turin kerna guru penawar, ia terkenal seh ku Aceh erkiteken kinimbisanna. Mulih ku taneh Karo mate kepe anakna Tandang Emas ras Tandang Suasa. Reh nina guru penawar ndai "adi kudat sepenggel saja tulan-tulan anakku ndai, banci ia kupekeke", tapi uga gegehna pe kinigurunna la bo terpekekesa anakna ndai.

Bageme siidah ras siakui maka kuasa kekeken Tuhan Jesus e, Dibata ngenca ngasup njadikenca. Emaka peristiwa kekeken e, ajaib ras luar biasa kel. Labo sembarangen si ibereken Tuhan kesempatan jadi saksi kerna kekekenNa bas si mate nari. Sebab kekeken Tuhan Jesus, eme sada pengarapen ras penggenepen padan Tuhan man kalak si malang man bana. Ise nge ndia si jadi saksi kekekenna e? Eme piga-piga diberu, Maria Magdalena, Johana, Maria nande Jakup ras lit denga si la tersinget gelarna. Diberu kerina, si pusuhna tertambat man Tuhan. Si erpagi-pagi lampas ingetna Tuhan Jesus, idahna atena, ilakokenna atena si mehuli man Tuhan Jesus e alu maba rempah ras minak.

Si jadi perenungenta engkai maka diberu jadi saksi, sementara lit denga nge ajar-ajar si 11 si dilaki? Sebab diberu pe ate Tuhan ipakeNa, sejajar ras dilaki. Ajar-ajar si sepuluh sada kalak enda nggo naksiken kuasa Jesus asum nggeluh, si diberu kerina pe ate ipake Tuhan jadi saksi kekekenNa. Maka sada kata si dilaki ras diberu, LA LIT KAI PE METAHAT BAS TUHAN. Enda mpegegehi kita kerina diberu subuk permata ntah moria ntah saitun, kita kap saksi kekeken e. Si saksikenlah alu ncidahken man doni enda ulih kekeken siidah kita ibas Tuhan, mahanca keke kinitekenta, tedeh ateta Tuhan e katawari pe janah lit lalap turah ukur ndalanken si mehuli, si ngena ateNa.